



春秋說畧卷五

樓霞郝懿行學

海陽趙銘彝校刊

僖公

元年春王正月

齊師宋師曹伯次于聶北救邢

伯當從公
穀經作師

狄入衛救邢何也邢衛接壤入衛則必及邢矣然則救邢不救衛何也蓋狄已去衛矣斯時戴公廬於漕先言次後言救何也凡次而救成救也救而次不成救也○公穀經作曹師是也左氏下經亦作曹師而此經作曹伯蓋誤

夏六月邢遷于夷儀

齊師宋師曹師城邢

再序三師著實也不言師則不知以師城也若言諸侯則不

知爲三國也言諸侯師則非辭也何以不曰城夷儀邢遷矣
城邢也亦著實也

秋七月戊辰夫人姜氏薨于夷齊人以歸

夫人薨于內不地于外則地夫人孫邾何以在夷傳曰齊人
召而殺之書曰薨諱也以歸者歸於齊也僖公請而葬之
楚人伐鄭

荆號楚始此

八月公會齊侯宋公鄭伯曹伯于榿

傳曰謀救鄭也

九月公敗邾師于偃

冬十月壬午公子友帥師敗莒師于鄆獲莒挈

敗邾於偃哀姜故也敗莒於鄆慶父故也傳曰求賂也獲戰

得也大夫生死皆曰獲諸侯死曰滅生日獲○傳曰詐戰曰

敗非也內敗外兵皆書曰敗豈盡詐戰

十有二月丁巳夫人氏之喪至自齊

不稱姜前已見也一事而再見者畧之君子諱國惡苟其辭

可畧則畧之畧之所以諱之也然則何以不於薨焉諱於薨

焉諱則其事遂不可知矣諱其惡而沒其事君子亦不爲也

○杜氏預曰不稱姜闕文也非也文姜不稱姜氏何以非闕

文此稱氏不稱姜逆婦姜于齊文四年稱姜不稱氏皆非闕文

也

二年春王正月城楚丘

楚丘邑名或曰衛邑以詩知之孰城之不知也傳曰諸侯城
之非也不書諸侯何由知是諸侯也方氏苞曰魯城之非也

不書城衛楚丘何由知非內邑也杜氏預曰大都以名通者

不繫國

杜說見莊三十二年春城小穀下

非也彭城虎牢何以繫國疑經有

闕文矣傳曰不與諸侯專封也非也專封之罪不大於存亡

之功孔子曰如其仁如其仁若不書諸侯是貶緣陵書諸侯

何以非褒

見僖十四年

夏五月辛巳葬我小君哀姜

虞師晉師滅下陽

虞先晉賂故也下陽附庸國也傳曰邑非也邑不言滅言滅

非邑也突入櫟而鄭舉矣入鄭不書不告也下陽滅而虢舉

矣滅虢不書不告也

秋九月齊侯宋公江人黃人盟于貫

傳曰服江黃也服江黃所以孤楚也傳又曰中國稱齊宋遠

國稱江黃以為諸侯皆至也非也至者至之不至者不至之

未有諸侯與會而不書者

冬十月不雨

楚人侵鄭

三年春王正月不雨

周之正月非雨節也不雨庸何病經之正月疑三月之誤杜

氏預曰一時不雨則書首月也

案莊三十一年冬不雨不書首月者僅一時也

夏四月不雨

徐人取舒

舒國也取者取為附庸也或曰書取者恕辭為其奉霸令披

楚黨也非也實滅言取豈春秋也

六月雨

凡不雨之書月舉者勤也時舉者慢也歷時而總舉者加慢
也有書不雨無書雨者此書六月雨何也喜也勤故喜喜則
書慢故不喜不喜則不書

見莊三十一年文
二年十年十三年

秋齊侯宋公江人黃人會于陽穀

傳曰謀伐楚也伐楚之役江黃不與何也與謀也

冬公子友如齊涖盟

來盟曰來往盟曰涖傳曰齊侯為陽穀之會來尋盟也

楚人伐鄭

四年春王正月公會齊侯宋公陳侯衛侯鄭伯許男曹伯侵蔡
蔡潰遂伐楚次于陘

先侵蔡誑楚也民逃其上曰潰遂者繼事之辭胡氏謂譏其
專非也伐而次何也用大師善持重為能不戰而屈人兵也

夏許男新臣卒

諸侯外卒在師稱師在會稱會此不言者許男有疾歸國而
卒君子謂之不知命

楚屈完來盟于師盟于召陵

盟不稱使非前定也既言來盟于師又言盟于召陵何也盟
於師者完之志桓公退舍以禮之故盟召陵方氏苞曰再言
盟者既盟於師復盟於召陵非也一盟而已再盟何為

齊人執陳轅濤塗

秋及江人黃人伐陳

孰及之魯之微者也

八月公至自伐楚

葬許穆公

冬十有二月公孫茲帥師會齊人宋人衛人鄭人許人曹人侵陳

齊桓畧於責楚苛於治陳轅濤塗之罪止於誤軍道耳執其人又侵伐其國甚矣齊桓矜帖荆功未良成而志已溢

五年春晉侯殺其世子申生

春秋書殺世子兄弟曰君屬辭之體也曰世子曰弟對君而言也傳曰甚之非也書世子書弟卽是甚之不待目君而見也晉申生宋痤皆自裁目殺者意成乎殺也

杞伯姬來朝其子

傳曰參譏也伯姬來因見其子攝行朝禮故書曰朝朝者其子繫之母者子幼不能朝也禮童子侯不朝蓋不可以成人

禮接也案何休云禮外孫初冠有朝外祖之道此曲說耳

夏公孫茲如牟

傳曰娶焉蓋因聘而逆也

公及齊侯宋公陳侯衛侯鄭伯許男曹伯會王世子于首止

及以會尊之也諸侯不敢與王世子齒也然則會之奈何王將以愛易嫡齊桓爲會以定之禮之變也殊會世子變之禮也

秋八月諸侯盟于首止

諸侯不序前日後凡也無中事而復舉諸侯見王世子不與盟也尊之也會盟同地而再舉別於異地也

鄭伯逃歸不盟

逃賤者事也言逃歸又言不盟明逃在盟前

楚人滅弦弦子奔黃

九月戊申朔日有食之

冬晉人執虞公

虞公天子三公也此滅矣不書滅何也不告也傳曰晉修虞祀歸其職貢於王則不以滅告可知不言以歸亦不告也虞公不名史闕也

六年春王正月

夏公會齊侯宋公陳侯衛侯曹伯伐鄭圍新城

秋楚人圍許諸侯遂救許

冬公至自伐鄭

致有二道有以先事致者有以後事致者大先事以先事致大後事以後事致凡致以告廟書也告以先事則以先事書以後事則以後事書不告則亦不書也○傳曰有二事偶則

以後事致後事小則以先事致非也又曰此不以救許致何也大伐鄭也非也伐鄭之義不大於救許或曰伐鄭本事救許繼事出以本事告故還以本事致亦非也二十八年會溫遂圍許繼書公至自圍許則非以本事致明矣

七年春齊人伐鄭

夏小邾子來朝

此邾也齊桓白天子進之故以爵通本邾國別封故稱小邾鄭殺其大夫申侯

秋七月公會齊侯宋公陳世子款鄭世子華盟于甯母

傳曰謀鄭故也

曹伯班卒

公子友如齊

冬葬曹昭公

八年春王正月公會王人齊侯宋公衛侯許男曹伯陳世子款盟于洮

傳曰謀王室也王人下士也先王人禮也盟王人非禮也○傳曰襄王定位而後發喪蓋左氏謂去年冬王崩然是年冬方見於經豈有秘不發喪終年之理未可信也

鄭伯乞盟

盟而後乞不得與盟也故盟無鄭伯

夏狄伐晉

秋七月禘于大廟用致夫人

禘僭也大廟周公廟也夫人者哀姜也致者祔於廟也夫人得罪先君不可致而致之也夫人葬八年矣至此始致者爲

疑其禮故遲也。方氏苞謂夫人風氏也致生者之辭也若哀姜入廟則當書祔非也祔亦致也禮夫人與祭君母不與祭若風氏入廟以母乎以婦乎以母則無其禮以婦則非所安故知夫人哀姜也哀姜本夫人故但書夫人卽知爲姜氏若風氏非夫人也但書夫人何以見爲風氏乎傳曰貶去氏非也

冬十有二月丁未天王崩

九年春王正月丁丑宋公御說卒

夏公會宰周公齊侯宋子衛侯鄭伯許男曹伯于葵丘

惠王未葬而宰出會蓋王有內難故也周采地也天子三公故以爵稱異於儲君故不殊會宋子者在喪之稱背殯忘哀非禮可知

秋七月乙酉伯姬卒

此未嫁也何以卒許嫁諸侯笄而字矣於其卒也以成人禮禮之猶未嫁故不繫國

九月戊辰諸侯盟于葵丘

曰諸侯盟見宰周公不與盟也先會後盟申明五禁翼戴天王再言葵丘與首止義同

甲子晉侯嵬諸卒

冬晉里克殺其君之子奚齊

凡遇弑雖未踰年稱君此其稱君之子何子者在喪之稱也以爲君也而實子以爲子也而君之矣君之子待猶君然則商人弑舍不曰君之子何也君之子也君也其文異其實同君曰弑君之子曰殺何也不言君者不稱弑。傳曰其君之

子者國人不子也非也特稱君者以君爲重耳若非以君爲重但書殺晉子足矣何迂言君之子且親殺者里克一人何足見國人不子也

十年春王正月公如齊

狄滅溫溫子奔衛

傳以溫爲蘇氏邑非也邑不言滅言滅非邑也溫蓋畿內國子爵也溫子不名史闕也。內諸侯之名見於戴記方氏苞疑之謂王臣無五等之爵不當稱子恐非也溫子爵也劉子單子亦爵也方氏以榮叔南季爲行次猶可也以劉子單子等爲尊異之稱不可也溫子國滅矣何以得尊異之稱也晉里克弑其君卓及其大夫荀息

奚齊也則子之卓子也則君之何也奚齊殺於次未葬也未

葬稱子卓子弒於朝已葬也已葬稱君荀息者不食言者也
君欲殺正則殺之君欲立不正則立之曰臣不食言而已與
卓皆死○死難之臣皆以來告得書不書不告也

夏齊侯許男伐北戎

杜氏預曰北戎山戎

晉殺其大夫里克

方氏苞曰非討其弒君之罪也則爲殺其大夫而已非也春
秋書殺大夫四十七無以別其孰殺之是孰殺之非也且以
魯史記他國之事但據赴告之辭書曰某國殺其大夫而已
其是與非何由盡知也春秋美惡不嫌同辭凡殺大夫皆不
去其官必據傳而別之孰爲非國討故不去其官孰爲稱人
以殺爲殺有罪孰爲稱國以殺爲殺無罪若罪累上則是紛

紛紛惟傳者之所顛倒而必屈經以從也據傳陳洩冶楚郤
宛皆無罪楚公子側鄭公孫黑皆有罪而皆不去其官傳說
紛紛自亂其例何足信乎

秋七月

冬大雨雪

十有一年春晉殺其大夫平鄭父

夏公及夫人姜氏會齊侯于陽穀

夫人聲姜齊侯之女其曰公及夫人猶愈乎公與夫人耳

據桓

十八年

秋八月大雩

冬楚人伐黃

十有二年春王三月庚午日有食之

夏楚人滅黃

國滅君死之正也盟于貫也江黃請服管子難之以為遠齊而近楚若伐而無救則無以宗諸侯矣信矣

秋七月

冬十有二月丁丑陳侯杵臼卒

十有三年春狄侵衛

夏四月葬陳宣公

公會齊侯宋公陳侯衛侯鄭伯許男曹伯于鹹

傳曰淮夷病杞故且為戎難謀王室也諸侯戍焉

秋九月大雩

冬公子友如齊

十有四年春諸侯城緣陵

傳曰諸侯散辭也桓德衰矣諸侯者誰不知也或曰會鹹者

也非也會鹹既改歲又間有異事何知非別國諸侯也傳曰

城緣陵遷杞也非也邢遷夷儀矣此不言杞不言遷何知非

城虎牢之例而必曰遷杞也即遷杞者疑經有闕文矣。傳

云淮夷病杞疑城緣陵而戍之與城虎牢同案地理志注臣

淄也營陵春秋謂之緣陵李穎曰緣陵在今青州之昌樂去

臨淄不二百里而去杞都之陳畱千數百里杞何由得遷於

夏六月季姬及鄆子遇于防使鄆子來朝

方氏苞曰內女適人者繫國未嫁書字季姬書字而不繫國

則女而非婦明矣蓋使自擇配故得與鄆子遇也如左傳鄆

季姬來寧公怒止之而要鄆子使來朝則當書某月鄆季姬

來某日及鄆子會於防使鄆子來朝以是知公穀二傳於經

爲合也明年季姬歸于郕以始嫁之辭書則此非歸寧益明矣

秋八月辛卯沙鹿崩案鹿當作麓古字通用

沙鹿晉山也不繫國名山大澤不以封何以書爲天下記異也

狄侵鄭

冬蔡侯肸卒

十有五年春王正月公如齊

公再朝於齊矣杜氏預曰諸侯五年再相朝禮也非也五年一朝天子禮也

楚人伐徐

三月公會齊侯宋公陳侯衛侯鄭伯許男曹伯盟于牡丘

遂次于匡

傳曰遂繼事也次止也有畏也

公孫敖帥師及諸侯之大夫救徐

諸侯在焉而大夫帥師桓德益衰矣

夏五月日有食之

傳曰不書朔與日官失之也

秋七月齊師曹師伐厲

八月螽

九月公至自會

季姬歸于郕

方氏苞曰內女之歸非失禮不書此以及郕子遇防而書也
已卯晦震夷伯之廟

雷曰震夷氏伯名或曰字非也春秋無書字之法或曰禮大夫既卒不名故稱字公子友如陳葬原仲亦字也非也杜氏預曰展氏夷諡非也原仲何以不稱諡也或曰大夫沒稱諡若字禮也然而春秋無大夫稱諡若字者也或曰葬而稱諡春秋大夫不書葬故不稱諡也非也原仲書葬矣亦不稱諡也

冬宋人伐曹

宋始背盟也盟會同而諸侯無私爭者三十載

楚人敗徐于婁林

病齊桓也傳曰徐恃救也

十有一月壬戌晉侯及秦伯戰于韓獲晉侯

凡戰不言伐者省文耳胡氏謂罪晉侯非也不以秦及晉者

內晉外秦也胡氏謂怨秦伯非也君獲不言師敗績君重於師也大夫獲必言師敗績大夫與師敵也

十有六年春王正月戊申朔隕石于宋五是月六鷓退飛過宋都

或言隕星或言隕石何也

據莊七年

夜隕見星故言星晝隕見石

故言石其體石其數五後數下辭也石隕在下故覽形而知數是月者何失其日也失其日則何以言是月避同日也六鷓退飛不言風非風也風則不成飛退則不獨鷓其體鷓其數六先數上辭也鷓飛在上故因數以察形或言宋或言宋都何也于宋者畧辭也宋都者專辭也何以書記異也列國告災不告異告異非禮也災須弔異自警而已

三月壬申公子季友卒

其稱季友何著親貴也胡氏曰魯卿有生而賜氏者季友仲遂命爲世卿也非也世卿多矣非必生而賜氏也季子來歸已稱季矣公子友如齊涖盟穀梁經已作季友未聞生而賜氏也竊疑季友仲遂生皆寵貴於其卒也魯君恩禮有加故舊史特以氏書耳

夏四月丙申郈季姬卒

內女爲夫人或卒或不卒者告則卒不告則不卒或曰爲之服則卒不服則不卒卒而或葬或不葬者往會則葬不往會則不葬郈季姬卒不葬魯不會也○內女爲夫人卒葬義當與外諸侯同方氏苞謂內女卒葬法不當書書者禮之變也恐非

秋七月甲子公孫茲卒

冬十有二月公會齊侯宋公陳侯衛侯鄭伯許男邢侯曹伯于淮

傳曰謀郈蓋郈爲淮夷所病也邢侯在鄭伯許男下亂王爵也○法氏坤宏曰魯頌閟宮云魯侯之功遂荒徐宅淮夷率從蓋謂此也

十有七年春齊人徐人伐英氏

夏滅項

孰滅之魯滅之何以不言我省文也入杞取郟取邾皆不言我也猶之會盟書及不曰其人卽知是我也不稱師不稱將將卑師少也胡氏謂內諱滅曰取此不諱者公在會也非也實滅言取非事實也內之惡有大於滅國者矣而不諱獨於滅國諱何也若滅國實當諱公雖在會猶在國也罪豈

末滅乎。○法氏坤宏曰：傳云會于淮謀郟，且東畧也。伐英滅項，皆東畧中事。又曰：書法與滅偃陽，同不言遂者，非繼生之事。懿行謂此以滅項爲齊人伐英氏者滅之也，但偃陽言遂，故知諸侯因會滅之，此不言遂，卽知魯人滅之矣。

秋夫人姜氏會齊侯于卞

卞魯邑也。淮在魯南，齊侯罷會過魯，姜氏出會之，猶陽穀意也。傳曰：齊以滅項止，公聲姜會齊侯而請，非也。魯齊姻也，又最相親，狄滅溫，齊不問，宋伐曹，齊不討，而獨以項故難魯乎。

九月公至自會

冬十有二月乙亥齊侯小白卒

十有八年春王正月宋公曹伯衛人邾人伐齊

納昭也。昭者齊桓生時，蓋嘗屬於宋桓公卒，無虧立，無虧者

庶長也。宋伐齊卒，殺無虧而立昭，宋與諸侯不知昭之不當立，而以爲德於齊桓也。又伐喪不義也。

夏師救齊

稱師將卑師衆也

五月戊寅宋師及齊師戰于廩，齊師敗績

四國伐齊，戰獨稱宋者，三國同伐，不同戰也。伐稱宋公戰，則稱師者，宋公親伐，不親戰也。

狄救齊

秋八月丁亥葬齊桓公

冬邢人狄人伐衛

傳曰：伐衛以救齊，狄稱人進之也，非也。卽進之者，當人於救齊之日，不當人於伐衛之日。趙氏鵬飛曰：狄稱人，便文爾。

十有九年春王三月宋人執滕子嬰齊

滕子何以名遂失國也

夏六月宋公曹人邾人盟于曹南

鄆子會盟于邾己酉邾人執鄆子用之

會盟者後會也用之者以祭也傳曰宋使之非也鄆宋使者不當獨稱邾也邾人戕鄆子於鄆豈亦宋使也鄆子不名史闕也

秋宋人圍曹

衛人伐邢

冬會陳人蔡人楚人鄭人盟于齊

外皆稱人內不目公益微者也胡氏曰諱也楚與諸侯會盟之始方氏苞曰諸侯與大夫共盟之始故書會而沒公皆非

也前此者荆人來聘矣不諱聘而諱盟何也後此者嬰齊會蜀矣不諱蜀而諱齊何也云惡惡疾其始亦非也惡莫大於篡弑而一一書之何不云亦疾其始也內大惡不諱公者多矣獨於此焉諱何也春秋諱國惡亦不沒其實若公實在會而沒公何以別於公實不在會者也變亂名實豈春秋也然則其會奈何傳曰陳穆公欲修齊桓之好爲此會或曰楚人攘霸之漸也地於齊者齊亦與盟○公羊經會上有公直書不諱則知凡言諱公者非矣

梁亡

此未有言伐梁者何以亡自亡也傳曰魚爛而亡也梁內訌而外潰秦因取之故不曰秦滅梁

二十年春新作南門

或言新或言新作何也言新有故也言作創爲也言新作非創爲而有加乎故也南門者法門也。方氏苞曰周官匠人營國方九里旁三門內外傳於列國無言南門者豈南門獨天子有與

夏郟子來朝

牟廷相曰鄭樵謂郟有二郟鼎者北郟來朝者南郟非也果有南北二郟經必曰南郟子如北燕伯之例也今旣不然知無二郟也左傳有莒之二方鼎亦謂莒鼎者西莒與公羊以郟子爲失地之君亦非

五月乙巳西宮災

諸侯三宮夫人居中右媵西左媵東其名爲小寢。法氏坤宏曰禮自命士以上父子異宮故有西東南北諸宮名衛風

稱東宮之妹左傳南宮适北宮喜以宮命氏則西宮亦異宮之通稱爾春秋謹災變故書

鄭人入滑

秋齊人狄人盟于邢

傳曰爲邢謀衛難也衛方病邢

冬楚人伐隨

二十有一年春秋侵衛

宋人齊人楚人盟于鹿上

夏大旱

或言雩或言旱何也雩而得禮不書雩雩而不得雨則書旱或言不雨或言大旱何也不雨者未大旱大旱者久不雨

秋宋公楚子陳侯蔡侯鄭伯許男曹伯會于孟執宋公以伐宋

先宋主盟也次楚攘霸也傳曰宋求諸侯於楚乃爲會乎孟
宋以乘車往楚以兵車會於是執宋公以伐宋不言孰執之
何也親執之者楚也聽之者諸侯也宋人愚楚人詐諸侯讐
冬公伐邾

楚人使宜申來獻捷

人疑子字之譌春秋全經無稱人以使者來獻捷威魯也執不稱楚獻捷

稱楚互見也執稱宋捷不稱宋亦互見也春秋文約而義明
傳曰爲宋諱胡氏曰爲魯諱皆非也

十有二月癸丑公會諸侯盟于薄釋宋公

書諸侯者前目後凡也不言孰釋之何也執之者釋之也傳
曰不言楚不與楚專釋也非也不與楚專釋亦當不與楚專
執而曰楚人來獻捷矣經言楚傳曰不言楚何也

二十有二年春公伐邾取須句

傳曰須句國也成風母家邾滅之公伐邾反其君然則其曰
取何也私爲附庸也俄而升陘之師來矣。案劉氏倣以經
無明文疑左氏之妄趙氏李氏汪氏皆從之蓋以須句邑也
夏宋公衛侯許男滕子伐鄭

秋八月丁未及邾人戰于升陘

不稱公非公也傳曰公戰而敗績非也及齊人戰于奚何不
亦曰公戰而敗績乎謂內諱敗故不稱公非也此未有言師
敗績者也謂內不言戰言戰乃敗非也乾時言戰又言敗。
檀弓記曰邾婁復之以矢蓋自戰於升陘始也鄭康成注云
時師雖勝死傷亦甚是知二國俱有傷敗此經所以書戰不
書敗也

冬十有一月己巳朔宋公及楚人戰于泓宋師敗績

宋挾三國伐鄭楚救鄭而戰宋不言三國先歸也春秋三十
四戰未有以師敗乎人以師敗乎人則不量故也

二十有三年春齊侯伐宋圍緡

宋伐喪齊伐敗皆不義也傳曰討其不與盟於齊

夏五月庚寅宋公茲父卒

秋楚人伐陳

冬十有一月杞子卒

稱子爵黜也不名史闕也

莊二十七年冬書杞伯來朝

二十有四年春王正月

夏狄伐鄭

秋七月

冬天王出居于鄭

方氏苞曰其書出何也去王畿而越在鄭地也與皇翟泉異
矣傳曰天子無出非也不書天王入何也王室禍亂魯不與
聞則史不書。案王出居鄭告使及魯故得書出魯不勤王
王入不告故不書入方氏苞謂魯人恥無功而不書非也

晉侯夷吾卒

二十有五年春王正月丙午衛侯燬滅邢

何以名傳曰滅同姓名非也滅同姓多矣舍此何以不名朱
子曰文與衛侯燬卒連蓋傳寫誤也

夏四月癸酉衛侯燬卒

宋蕩伯姬來逆婦

蕩氏也自逆婦非禮也公自主女亦非禮也

宋殺其大夫
不名者史失之

秋楚人圍陳納頓子于頓

不言遂非繼事不再舉楚人非更端凡諸侯出奔名他國納之則不名互見也頓子出奔不書不告也

葬衛文公

冬十有二月癸亥公會衛子莒慶盟于洮

傳曰衛人平莒於我也衛稱子者既葬稱子踰年卽位卽位稱君。方氏苞曰成公以前列國大夫會盟無以名見者至春秋之終小國大夫會盟無以名見者莒慶何以名魯姻也故史稱名寵異之懿行謂非也稱名不稱名無義例若謂莒慶魯姻獨得稱名明年又名衛甯速其義何居

二十有六年春王正月己未公會莒子衛甯速盟于向

齊人侵我西鄙公追齊師至鄆不及

侵曰人追曰師互見也傳曰以公之弗及大之非也。方氏

苞曰戰稱人敗稱師春秋之通例戰稱人者兼將而言也敗

稱師間亦稱人者別衆寡也胡傳非也

夏齊人伐我北鄙

衛人伐齊

公子遂如楚乞師

師曰乞重師也傳曰非所乞也

秋楚人滅夔以夔子歸

不名史闕也或曰非其罪也非也滅國而名者多矣豈皆其罪也傳曰夔祖熊摯不祀祝融鬻熊禮也然而楚人滅而虜

冬楚人伐宋圍緡
公以楚師伐齊取穀
公至自伐齊

二十有七年春杞子來朝

夏六月庚寅齊侯昭卒

秋八月乙未葬齊孝公

乙巳公子遂帥師入杞

冬楚人陳侯蔡侯鄭伯許男圍宋

楚稱人臣也諸侯稱爵君也或曰曹南之爵宋也予以霸也
齊此圍宋之不爵楚也嫌予以霸也非也霸不霸不繫乎予不
予聖人亦無予人以霸者傳曰楚人楚子也人楚子所以人

諸侯也非也城濮之戰豈亦人楚子也蓋人得臣也鄢陵之
戰則子楚子矣○楚稱人不宜序諸侯上疑人當為子字之

譌據文二年盟垂隴
晉士穀序諸侯下

十有二月甲戌公會諸侯盟于宋

公不與圍也諸侯不序前目後凡也○方氏苞曰此經第書

諸侯諱楚大夫先諸侯也文之篇盟扈會扈第書諸侯諱晉

大夫先諸侯也非也此盟於宋謂楚必與盟固也不書楚者

省文爾若書公會楚人諸侯盟則不辭書公會諸侯及楚人

盟則辭費故不言楚即知盟者有楚也且圍宋之役楚實主

兵則此盟楚實主之雖不言楚無嫌楚不與盟也若盟扈會

扈不序諸侯史文畧也不書晉人著其實也未有與會盟而

不書者經不書晉人何知其中必有晉人乎然則諸侯城緣

陵方氏何知其中必無齊人乎春秋據事直書不沒其實獨於國惡不無少諱而謂列國會盟皆有諱然則春秋諱惡之書乎
二十有八年春晉侯侵曹晉侯伐衛
再舉晉侯兩事也
公子買戍衛不卒戍刺之
刺者殺也內諱殺曰刺刺或言其故或不言其故
知也傳曰先名後刺殺有罪也非也有罪無罪不繫於名之先後也若以言故不言故則言故者安知非加之罪不言故者安知非當其罪也

楚人救衛

三月丙午晉侯入曹執曹伯畀宋人

執諸侯或稱爵或稱人無義例傳曰稱爵者霸討稱人者非霸討非也春秋惡諸侯專執耳非瑣瑣然別其孰為霸討孰為非霸討也聖人亦何取以霸討予人乎若以稱爵為霸討則執曹伯畀宋人所謂霸討安在乎傳曰曹共公為不道遠君衛侯歸京師所謂非霸討安在乎傳曰曹共公為不道遠君子近小人赤芾乘軒者三百人也畀與也執之是也畀宋非也以是為諉也

詳見成十五年執曹伯歸于京師下

夏四月己巳晉侯齊師宋師秦師及楚人戰于城濮楚師敗績晉稱爵君也三國稱師臣也又以著眾也書晉及楚以內及外也楚人者成得臣也戰稱人敗稱師者互見也晉之為此戰何也齊桓沒宋襄虜楚虎狼將薦食諸侯晉文扼其吭而擊之楚大創數年不出

春秋說略 卷五
楚殺其大夫得臣

衛侯出奔楚

出奔皆名衛侯何以不名凡出奔而名者國有二君非名無以別也衛侯出而叔武攝非二君也故不名

五月癸丑公會晉侯齊侯宋公蔡侯鄭伯衛子莒子盟于踐土衛子者何杜氏預曰衛侯出奔其弟叔武攝位受盟非王命所加從未成君稱子序鄭伯下

陳侯如會

如會者後會也不言會盟不盟也

公朝于王所

朝不言所言所非所也王所者踐土也何以不言踐土諸侯在曰踐土王在則曰王所矣王何以在踐土王聞戰勝下勞

晉侯晉侯除踐土而宮焉諸侯朝乎是然則何以不言諸侯畧辭也何不先言朝先盟也

六月衛侯鄭自楚復歸于衛衛元咺出奔晉

衛侯出奔不名復歸名何也出奔不名未失國也託之乎叔武復歸而名嘗失國也入殺乎叔武奔而名之無以見其未失國歸而不名之無以見其嘗失國也此曰復歸後曰歸畧辭也殺叔武不書不告也元咺走之晉愬其君

陳侯款卒

秋杞伯姬來

歸寧常事不書非常書之此何以書入杞之怨釋也

公子遂如齊

伐齊之怨釋也

冬公會晉侯齊侯宋公蔡侯鄭伯陳子莒子邾子秦人于溫
傳曰討不服也

天王狩于河陽

踐土不言王狩省文也河陽言王狩互見也以河陽言狩則
知踐土亦狩也狩巡狩也傳曰實名而言狩諱也非也即晉
實召王王亦必以狩行安得不書狩也河北曰陽其地即溫
也於諸侯會曰溫切言之也於天王狩曰河陽大言之也○
竹書紀年云周襄王會諸侯于河陽春秋書云天王狩于河
陽推此而言魯史舊文亦當如竹書所記

壬申公朝于王所

冬不書月空書壬申史闕文也再言王所非京師也

晉人執衛侯歸之于京師

李氏光地曰王在京師則曰歸于京師義已備也京師即王
也王在會所則曰歸之于京師義始備也王既知其事矣歸
其人於京師耳懿行謂或言歸于或言歸之于者詳畧辭耳
衛元咺自晉復歸于衛

晉文聽臣訴而執君偵也元咺挾霸權以歸國仇也凡歸者
或言歸或言復歸文有詳畧耳或曰歸善辭復歸惡辭非也
諸侯遂圍許

諸侯者朝王之諸侯遂繼事也繼朝王之事諸侯不序前自
後凡也圍許者討不服也

曹伯襄復歸于曹遂會諸侯圍許

自宋歸也不言者畧辭也執不名復歸名何也義與衛侯鄭
同○凡歸或書自某或不書自某赴告有詳畧耳傳曰自某

者某有奉非也

二十有九年春介葛盧來

介微國葛盧名不稱朝不能行朝禮公在會故冬復來

公至自圍許

夏六月會王人晉人宋人齊人陳人蔡人秦人盟于翟泉

傳曰謀伐鄭也王人王之下士也內不目公外皆稱人皆卿

大夫也王人與諸侯會可也與諸侯之大夫會不可也卑王

之使卑王也晉文為之也翟泉近王城公然會盟疆偏甚矣

或曰內諱公外人諸國之卿貶也非也此皆人矣何知會必

有公也。公羊穀梁經會有公亦無諱公之說

秋大雨雹

雹冰雨也大則為災故書無月日史闕也。高氏問曰劉向

云雹者陰脅陽也霰者陽薄陰也春秋不書霰猶不書月食

冬介葛盧來

三十年春王正月

夏狄侵齊

秋衛殺其大夫元咺及公子瑕

以咺及瑕何也瑕非能立也咺存則存咺死則死瑕立踰年

不稱君何也非君也瑕為咺私立衛侯尙在故不稱君

衛侯鄭歸于衛

歸易辭也咺死而歸易矣何以不言歸自京師畧辭也

晉人秦人圍鄭

鄭不與翟泉之盟以為貳於楚也而討之經言晉人秦人傳

言晉侯秦伯非也

介人侵蕭

冬天王使宰周公來聘

公子遂如京師遂如晉

冢宰下聘國卿報聘若敵國然前此內大夫未有如京師者自此始晉文為之也胡氏謂以二事出是夷周於晉非也先周後晉未為不可

三十有一年春取濟西田

傳曰曹田也何以不繫曹蓋魯故田也濟西大名也田何以不目取者多畧辭也凡內取田邑不繫國者皆魯故田濟西汶陽是也繫國者取邾田是也鄒東沂西不繫國者蒙上伐

邾文也

見襄十九年哀二年

公子遂如晉

夏四月四卜郊不從乃免牲猶三望

魯郊非禮也卜郊何也卜日與牲日用辛不於冬至於祈穀避王也夏四月何為乎牲有二帝牛不吉卜稷牛遠怠慢也

凡卜日比旬而卜之更三旬吉則為凶則已若牲更三卜皆不吉亦不郊何有四卜乎不從者龜逆也乃者不得已也免

猶縱也免牲則不郊矣傳曰免牲者為之緇衣纁裳有司玄端奉送至於南郊免牛亦然然則或言牲或言牛何也未牲

曰牛既卜曰牲猶者可以已也何謂三望傳曰泰山河海杜預曰星辰山川禮有四望去一下天王也望者郊之餘也不

郊何為乎望魯僭郊於是始

案周禮大司樂四望蓋祀天神之屬注云星辰風雨其下方言

祭山川與公羊杜氏異未知其審鄭氏云三望淮海岱恐非也

秋七月

冬杞伯姬來求婦

非歸寧也特以求婦來也自求婦非禮也凡言婦者有姑之辭

狄圍衛

十有二月衛遷于帝丘

狄侵齊不知圍衛不問於是遷帝丘而避焉病晉文也

三十有二年春王正月

夏四月己丑鄭伯捷卒

衛人侵狄

秋衛人及狄盟

再舉衛人兩事也

冬十有二月己卯晉侯重耳卒

重耳自狄入晉不書入不告也凡外事告則書

三十有三年春王二月秦人入滑

齊侯使國歸父來聘

夏四月辛巳晉人及姜戎敗秦師于殽

晉稱人大夫將也傳曰晉子親之貶而稱人非也如當貶者

直書晉子文乃是貶今日曰晉人而已何由知為晉子乎晉文

甫沒秦人下兵畿內有窺周室主夏盟之心伯禽衰經與戎

晉子墨經發命亦奚不可乎是役也先軫實為謀主傳曰子

墨衰經遂發命而已不言晉子親之也姜戎稱及晉為主也

秦入滑稱人敗殺稱師互見也。晉人敗狄于箕晉人伐許

皆在是年二傳不云稱人是貶何也

癸巳葬晉文公

狄侵齊

公伐邾取訾婁

秋公子遂帥師伐邾

晉人敗狄于箕

冬十月公如齊

十有二月公至自齊乙巳公薨于小寢

小寢非正也傳曰卽安也

隕霜不殺草李梅實

或舉草或舉菽何也殺菽秋寒也不殺草冬煥也冬當無草故不殺為異秋當有菽故殺為異李梅實實為異。傳云舉

重舉輕非也

隕霜殺菽見定元年

晉人陳人鄭人伐許

春秋說略卷五

春秋說畧卷六

棲霞郝懿行學

海陽趙銘彝校刊

文公

元年春王正月公即位

傳曰繼正即位正也即位改元必於歲首正始也公未葬何以即位即位者以踰年為限不以葬為限未葬何以稱公稱公者以即位為限不以葬為限即位者易服告廟臨羣臣事畢反喪服。胡氏據虞商書謂冢宰攝告廟臨羣臣朱子曰他事可攝即位不可攝又曰王侯以國為家雖先君之喪猶以為己私服明知即位必吉服矣

二月癸亥日有食之

天王使叔服來會葬

叔氏服名士也或曰大夫也諸侯葬天子使大夫會禮也凡外大夫來會葬不書此書者尊王使

夏四月丁巳葬我君僖公

天王使毛伯來錫公命

錫先君命則舉諡錫時君命則稱公皆非禮也傳曰禮有受

命無來錫命錫命非正也

舉諡見莊元年

晉侯伐衛

叔孫得臣如京師

衛人伐晉

秋公孫敖會晉侯于戚

大夫特會諸侯於是始

冬十月丁未楚世子商臣弑其君頹

春秋討亂賊非能誅其身也而曰亂賊懼何也凡春秋書之即討之矣惡乎討之以君父討之稱世子者以父討之稱其君者以君討之。啖氏助曰楚僭號已久世子必不誓於天子今以商臣大逆故特書世子以明其罪懿行謂不特此也凡春秋以世子書者蓋皆不誓於天子也然不稱世子更別無可稱故知稱者窮於辭耳。方氏苞曰世子弑君未有直赴鄰國者蓋皆以傳聞書也非也弑逆大惡春秋不以疑加人傳聞之辭奈何輕以坐人乎竊謂弑逆之賊雖不肯直赴鄰國但其國史不容不書孔子修春秋於列國寶書蓋嘗親見如董狐南史輩直筆見存皆確有依据而謂傳聞之辭便筆之於書乎必不然矣

公孫敖如齊

二年春王二月甲子晉侯及秦師戰于彭衙秦師敗績

戰稱人敗稱師常也此戰敗皆稱師師衆也○方氏苞曰赴告第稱師而不及主兵者則莫辨其爲君爲大夫故第稱師也非也此自將卑師衆耳君將不稱師

丁丑作僖公主

主依神也古者葬而虞期而練練而祔其祭三其主二虞者喪主也練者吉主也喪主桑吉主栗栗主藏桑主埋桑主祭於寢栗主祔於廟僖公薨十五日矣而作主爲虞乎爲練乎或曰蓋祔也將躋僖公疑之是以緩

三月乙巳及晉處父盟

孰及之蓋微者也微者何大夫也大夫何以不名大夫之名不登於春秋春秋名者皆卿也處父不氏闕文也何以知非

未賜族也伐江稱氏矣

見三年

盟不地者於晉也此卿大夫盟

何以書晉之國都而卿大夫盟乎是以是爲伉也○傳曰不言公爲諱也非也不言公何以知其爲公也曰處父去氏也非也卽去氏者何以別於秦術吳札也若曰貶也以卿大夫伉盟諸侯於國都直書公及晉陽處父盟不愈見貶乎傳曰何以不言公如晉所恥也出不書反不致也非也出不書反不致其非公也明矣如實公者出不書反不致何足殺恥乎又何以別於非公者也

夏六月公孫敖會宋公陳侯鄭伯晉士穀盟于垂隴

傳曰晉討衛也此士穀主盟序諸侯下大夫不先諸侯也

自十有二月不雨至于秋七月

歷時而言不雨者不憂雨也不言八月雨者不喜雨也○言

自至于者總畧之辭公不憂雨故書辭從畧十年十三年自
正月不雨至于秋七月義並同

八月丁卯大事于大廟躋僖公

有事者時禘也大事者大禘也禘何以爲大事諸侯之祭無
大於此也然則何以不曰禘春秋文不虛設凡不曰祭名者
無譏於祭也曰祭名者有譏於祭也此於祭無譏故不曰也
何謂時禘四廟之主合食於大廟何謂大禘毀廟之主皆陳
於大廟躋升也何謂躋僖公先之乎閔也閔雖弟君也僖雖
兄臣也古者父子異昭穆兄弟同昭穆於魯之祭則惠莊爲
昭皆南面西上隱桓閔僖爲穆皆北面西上於其位之序則
隱在西桓次之閔在西僖次之

冬晉人宋人陳人鄭人伐秦

傳曰報彭衙也其稱人大夫也或曰貶非也

公子遂如齊納幣

納幣何以書譏喪娶何以不於娶焉譏娶在喪以納幣在喪
內三年之內不圖婚○昏禮先納采問名納吉乃納幣今言
納幣則三者更早可知

三年春王正月叔孫得臣會晉人宋人陳人衛人鄭人伐沈沈潰
夏五月王子虎卒

王臣無外交何以卒告則卒弔則卒卒非也葬甚矣○孔氏
穎達曰王子虎卽王叔文公也諡之爲文必當有爵不書爵
者畿內之國不得外交諸侯其臣不敢赴魯必天子爲之赴
赴以王子爲親不復言其爵也

秦人伐晉

秋楚人圍江

雨蝻于宋

雨者自上而下蝻來衆多勢如雨降在宋之境禾稼盡矣又食屋之茅茨。○傳曰墜而死非也蝻本以災書墜而死又何書乎

冬公如晉十有二月己巳公及晉侯盟

公蓋卽位始朝於晉也則知及處父盟者非公也。○二年傳曰晉人討公不朝使處父盟公以恥之此傳又曰晉人懼其無禮於公也請改盟非也前乎此者魯君未嘗朝晉也文公立甫十六月晉遽以不朝來討此非人情旣盟以恥之而又懼其無禮何也此皆傳者妄說何足信也

晉陽處父帥師伐楚以救江

伐未有目其故者此何爲伐以救伐其事也救其意也。○李氏光地曰若止書救江則處父之師向楚而不向江故書法如此懿行謂若止書伐楚又無以見意爲救江及避實擊虛之本謀也此與成宋亂宋災故之類皆經文自下注解不待傳而明者也

四年春公至自晉

夏逆婦姜于齊

卿爲君逆稱夫人臣子辭也此不稱夫人公自逆也何以不稱公蒙前文也公旣自逆矣若書公逆夫人于齊則不辭書公逆婦姜於齊則又不辭故不稱公也謂諱公者非也婦者有姑之辭姜不氏何也文畧爾王姬歸于齊言姬不言氏紀季姜歸于京師言姜不言氏其有言者何也文有詳畧非義

春秋傳卷之六
五
例也謂不氏爲貶者非也姜卽氏矣而云去氏以貶是猶言
東方西方而云去方以貶也然則亦可云加方是褒也夫言
東西矣卽不言方可知爲東西方也言婦姜矣卽不言氏亦
可知爲姜氏也今不可謂去方是貶顧可謂去氏是貶乎曰
婦姜曰夫人婦姜旣皆爲貶矣則未知曰夫人婦姜氏獨何
以爲褒也喪圖婚者公之失何爲貶去夫人之氏乎夫人不
致何也凡致以告廟書也告廟則致不告廟則不致

狄侵齊

秋楚人滅江

晉侯伐秦

衛侯使甯俞來聘

冬十有一月壬寅夫人風氏薨

此非夫人何以夫人之成乎夫人也然則仲子何以不夫人
之猶未成乎夫人也

五年春王正月王使榮叔歸含且賵

珠玉曰含含所以實口也含賵二事言且者兼之王不稱天
或曰貶也非也妾僭嫡不重於臣篡君錫命桓公一貶而已
會葬成風何故再貶

三月辛亥葬我小君成風

王使召伯來會葬

先葬後會不及葬也與元年會葬僖公文異以是知之傳曰
會葬之禮於鄙上

夏公孫敖如晉

秦人入郟

春秋傳卷之六

文公

六

春秋左傳卷六

秋楚人滅六

六年春葬許僖公

夏季孫行父如陳

秋季孫行父如晉

八月乙亥晉侯驩卒

冬十月公子遂如晉葬晉襄公

晉殺其大夫陽處父晉狐射姑出奔狄

傳曰狐射姑使續鞫居殺之是兩下相殺也經何以書晉殺

乎書晉殺則非射姑殺明矣處父殺而射姑奔此與佞夫殺

而王子瑕奔何以異傳未可信殺佞夫見襄三十年

閏月不告月猶朝于廟

閏月者非常月也中朔大小不齊正之以閏積分而成於月

不告月者不告朔也不言朔言月者胡氏謂主乎月而有閏

故以月言也諸侯必告朔何也尊王敬祖也朝于廟何也諸

侯親廟三皆月祭之其禮簡故不言祭而言朝也公忘棄時

政以閏為附月不復告朔猶者可已而幸其不已也經書閏月皆在

歲終此閏亦是十二月也當時歷法疏謬左氏遂以閏三月為非禮穀梁以為附月之餘日所謂附者亦是附於歲終也

○馮氏荆南曰告朔非告於廟也以是月應行之政告羣臣

耳閏月不告月猶朝于廟則為二事可知矣既朝于廟何難

以朔告哉魯論子貢欲去告朔之餼羊餼餽生者之辭也蓋

以月政告羣臣而因以餼之也

七年春公伐邾

三月甲戌取須句遂城郕

僖公嘗伐邾取須句矣此復言取則中間嘗失之可知以此復書取則邾人取之不必書春秋文簡而義明諸如此者皆互見也城郟備邾也

夏四月宋公王臣卒

宋人殺其大夫

不名史闕也。方氏苞曰赴告不及以傳聞書其名不可得詳也非也宋司城來奔其名非不得詳矣而亦不書名何也

見年

謂以傳聞書亦非也

戊子晉人及秦人戰于令狐晉先蔑奔秦

稱人者大夫將也不稱師師少也言戰不言敗勝負敵也言奔不言出在外也

狄侵我西鄙

秋八月公會諸侯晉大夫盟于扈

諸侯不序畧辭也大夫不名衆辭也與盟蕪同矣

莊九年

何以

盟傳曰晉侯立故也又曰公後至故不書所會非也諸侯不序大夫不名無以見爲公後至也卽後至者何以得書會書盟也胡氏謂趙盾內專廢置外強諸侯爲盟不名者見大夫強非也見大夫強反不書大夫之名何足見強乎方氏苞謂義在大夫不在趙盾非也新城書趙盾不聞義在趙盾也垂隴書士穀不必義在士穀也齊大夫盟蕪又不聞義在齊大夫也

冬徐伐莒

公孫敖如莒涖盟

八年春王正月

夏四月

秋八月戊申天王崩

冬十月壬午公子遂會晉趙盾盟于衡雍

乙酉公子遂會雜戎盟于暴

盟趙盾盟雜戎兩事也故再稱公子不同日故各日其會胡氏以爲別內外非也

公孫敖如京師不至而復丙戌奔莒

如京師弔也不至而復逃也未至者緩辭不至者決辭還者事已畢復者事未畢傳曰奔莒從已氏也不言出在外也敖之罪甚矣魯亦不更使人往

螽

宋人殺其大夫司馬宋司城來奔

司馬司城其官也未有書官者此何以書不知也傳曰公子卯黨昭公坐是被殺蕩意諸效節而走之然則何以不名不知也方氏苞謂貴之故不名蓋魯史之情非春秋之法也史不書其名孔子亦無從而益之矣。程子曰諸侯之卿皆不書官以不受命於天子故不與爲卿惟宋王者後得命官故宋卿獨書官懿行案左氏傳凡書宋亂必列序六官與他國異程子之說恐是方氏非之殆不然

九年春毛伯來求金

夫人姜氏如齊

二月叔孫得臣如京師辛丑葬襄王

毛伯求金供葬也不稱王使未葬也王葬會則書

晉人殺其大夫先都

三月夫人姜氏至自齊

夫人如齊歸寧也反而告廟所以得書然則夫人何為有致有不致告廟則致不告廟則不致夫人何為有告有不告以禮行則告不以禮行則不告或雖以禮行慢亦不告也然則致夫人何為與公同夫人與公一體也

晉人殺其大夫士穀及箕鄭父

晉殺三郤不稱及此稱及者蓋以貴及賤也方氏苞曰趙盾殺之非也趙盾殺經何以書晉人殺乎胡氏例以稱人以殺為國亂無政眾人擅殺非也方氏又謂殺大夫非若弑君可目其人兩下相殺不書雖得其主名舍晉人無以稱也非也以理揆之眾人擅殺而無主名者宜書盜盜殺陳夏區夫是也有主名者宜書名王札子殺召伯毛伯是也而謂兩下相

殺不書有是理乎國君專殺猶惡之若兩下相殺所謂先有無君之心而後動於惡履霜堅冰此其漸矣乃謂殺大夫非若弑君可目其人不亦謬乎凡春秋書殺大夫義繫於殺所以著國君專殺之罪與失政刑耳義不繫於稱國稱人也方氏又謂弑君稱國為懸獄稱人為無主名亦非也

楚人伐鄭公子遂會晉人宋人衛人許人救鄭

夏狄侵齊

秋八月曹伯襄卒

九月癸酉地震

震動也地靜以動為異地何為震陽伏而不出陰遁而不烝於是乎震不目其地者地異廣遠不限一方故地震山崩不

繫國春秋地

震五

冬楚子使椒來聘

楚稱子便文爾不可曰楚使椒又不可曰楚人使椒也或曰
褻之或曰進之皆非也春秋黜吳楚何為進之褻之也若以
來聘為美前此者會于孟執宋公稱子矣後此者次厥貉伐
麋稱子矣豈亦為進之褻之乎椒不氏畧之也

秦人來歸僖公成風之襚

衣服曰襚孰為襚兼襚也若非兼襚則不須言僖公也成風
嘗稱夫人矣此何以不夫人也便文爾不可曰僖公夫人成
風又不可曰夫人成風僖公也然則子亦可以先母乎母以
子貴傳曰秦人弗夫人也非也魯人夫人之秦人安得不夫
人之乎

葬曹共公

十年春王三月辛卯臧孫辰卒

夏秦伐晉

秦無人畧辭也或曰黜秦非也

說見昭十二年
晉伐鮮虞下

楚殺其大夫宜申

自正月不雨至于秋七月

及蘇子盟于女栗

孰及之蓋大夫也大夫亦可盟王臣乎奚不可也翟泉是矣

僖二十九年王臣之爵視諸侯大夫既可盟諸侯奚不可盟王臣

乎何以知非沒公也公與大夫盟則不諱與王臣盟焉諱何
也出不書反不致則非公也可知矣然則逆婦姜于齊亦出
不書反不致何由知必是公也以不書夫人知之也蘇子者
何周卿士也或曰即溫子非也溫滅矣此蘇子也或曰蘇子

畿內諸侯子爵也何以盟傳曰頃王立故也或曰私交也。陸氏淳謂畿內諸侯皆曰子殷制已然方氏苞非之謂蘇子稱子非五等之爵蓋特爲是稱以尊異之又謂自是以後會盟征伐王臣與諸侯列序皆稱子非也王臣皆稱子而召伯毛伯復不稱子何也孟子曰天子之卿受地視侯大夫受地視伯元士受地視子男祿既視之則爵當視之可知方氏謂王臣無五等之爵非也又謂春秋王臣無稱侯男者則伯與子非爵亦非也伯與子蓋春秋時適有此爵耳且如漢世功臣止有列侯而無伯子男豈亦可云非爵也

冬狄侵宋

楚子蔡侯次于厥貉

傳曰將伐宋也不言伐蓋宋服故

十有一年春楚子伐麋

夏叔仲彭生會晉郤缺于承筐

公穀經無仲字

傳曰謀諸侯之從楚者。叔仲彭生公穀經皆無仲字以十四年伐邾證之此蓋衍文

秋曹伯來朝

公子遂如宋

狄侵齊

冬十月甲午叔孫得臣敗狄于鹹

傳曰長狄鄭瞞也自晉人敗之箕其後侵齊侵魯侵宋至是復侵魯得臣獲其渠魁鄭瞞遂弱

十有二年春王正月邾伯來奔

不名者史失之也或曰莊八年邾降于齊師自是入齊爲附

庸故來奔不名非也附庸之君失地亦當書名或曰不名者有攝君如衛侯鄭矣。傳曰邾太子朱儒以邑來奔公以諸侯逆之故稱邾伯非也以子叛父又未即位安得爲邾伯也杞伯來朝

其稱伯蓋爵復進故

二月庚子子叔姬卒

稱子者時君女也不繫國未嫁也。傳曰不言杞絕也啖氏助曰左傳大誤當在成八年誤置此耳。方氏苞曰十四年齊人執子叔姬時君之子不應有兩叔姬豈此經承庚子之文而錄者誤衍與

夏楚人圍巢

秋滕子來朝

秦伯使術來聘

冬十有二月戊午晉人秦人戰于河曲

不言及闕文也傳曰以其亟戰畧之或曰二國邊邑之爭故不書及皆非也不言敗交綏而退勝負敵

季孫行父帥師城諸及鄆

稱及者先後之辭帥師而城畏莒故也鄆者莒魯所爭。舊說魯有二鄆此東鄆近莒故杜預曰莒魯所爭成四年所城乃西鄆近晉故杜預曰備晉也

十有三年春王正月

夏五月壬午陳侯朔卒

邾子蘧蒢卒

自正月不雨至于秋七月

大室屋壞

大室者大廟之室屋何以壞自壞也天久不雨而廟屋自壞志不敬也壞則必修何以不書凡新宮廟不書非禮書○公羊經大字作世傳曰魯公稱世室如此則魯有不毀之廟二故吳氏澂以爲僭然經不書新作世室則亦未爲非禮也冬公如晉衛侯會公于沓

狄侵衛

十有二月己丑公及晉侯盟公還自晉鄭伯會公于棐

會于沓會于棐要會也蓋介公以通於晉也

十有四年春王正月公至自晉

邾人伐我南鄙叔彭生帥師伐邾

夏五月乙亥齊侯潘卒

六月公會宋公陳侯衛侯鄭伯許男曹伯晉趙盾癸酉同盟于新城

傳曰從於楚者服且謀邾也凡盟會書日或舉於首或舉於中舉於首者會之日卽盟之日也舉於中者會在先盟在後也

秋七月有星孛入于北斗

有者不宜有也星孛者孛星也先言星外孛於星也孛謂之彗邪氣所生北斗者辰星也言入者斗有環域入其魁中○傳曰宋齊晉之君當此蓋北斗衆星紀綱三國諸侯紀綱言不出七年者斗數七也然天道幽遠其應難知故無取焉公至自會

晉人納捷菑于邾弗克納

晉人者誰或曰趙盾或曰卻缺或曰卻克不知也傳曰捷菑
晉出也爲是納之邾人曰齊出獲且長於是引而去之弗克
者義弗克也以晉之疆也而不能行於邾非義故也傳曰稱
人貶也非也曰弗克納其罪已見何待貶也。胡氏謂內以
諱爲貶外以諱爲善非也聖人爲魯臣子於外何諱焉
九月甲申公孫敖卒于齊

奔大夫不卒此何以卒爲受其喪卒也受其喪則何爲卒不
受其喪非大夫也受其喪則大夫矣大夫卒矣

齊公子商人弑其君舍

舍未踰年何以稱君凡遇弑雖未踰年稱君稱君所以重弑
也

宋子哀來奔

子哀者何不知也傳曰高哀爲蕭封人不義宋公辭卿而奔
書字貴之方氏苞曰非也古有以子某名者陳子亢介子推
是也春秋無以字書者

冬單伯如齊齊人執單伯齊人執子叔姬

單伯魯大夫也子叔姬魯女也舍遇弑叔姬其母也魯使單
伯唁之商人怒而執焉再稱齊人兩事也不以單伯及子叔
姬別嫌也。方氏苞曰傳以叔姬爲舍母非也果舍母則當
書齊人執其君之母叔姬蓋姬舍所聘至齊舍已見弑不得
稱君夫人懿行謂非也春秋比事屬辭文約而義明上書弑
舍下書執子叔姬則知爲舍母也猶之上書子卒下書夫人
姜氏歸于齊則知爲子母也何必書君之母始見乎其謂叔
姬爲舍所聘尤非也五月齊侯潘卒九月舍已遇弑中間纔

四月苦塊之中豈卽圖婚果以喪婚經當書齊人來逆子叔姬而又不言果何見而云舍所聘乎此說蓋本之吳氏激而誤

十有五年春季孫行父如晉

三月宋司馬華孫來盟

方氏苞曰不名何也魯人以爲敏而貴之猶齊仲孫高子宋司馬司城之不名耳不書使非奉命而來盟也

夏曹伯來朝

齊人歸公孫敖之喪

敖以罪出不當受其喪魯人感子以赦父非禮也歸不言來齊人止至境孟氏迎以歸

六月辛丑朔日有食之鼓用牲于社

單伯至自齊

大夫不致執則致

晉郤缺帥師伐蔡戊申入蔡

秋齊人侵我西鄙

季孫行父如晉

冬十有一月諸侯盟于扈

諸侯不序畧辭也晉靈公之世大夫數出會諸侯大夫強也

諸侯多不序散辭也霸業衰故。傳曰謀伐齊齊人賂晉侯

不克而還非也若晉侯主盟經何不書也方氏苞曰盟扈會

扈蓋以晉大夫實序諸侯上故總言諸侯而沒晉大夫非也

若大夫主盟經何不書也大夫雖主盟仍序諸侯下垂隴新

城是也

見二年及十四年

十有二月齊人來歸子叔姬

來歸者大歸也稱齊人者制在齊人也

齊侯侵我西鄙遂伐曹入其郭

侵魯者以怒魯故伐曹者以朝魯故郭者城外郭

十有六年春季孫行父會齊侯于陽穀齊侯弗及盟

可以會亦可以盟何以弗及難魯也於是公有疾齊曰請侯

君間未幾以賂故盟于鄆丘

夏五月公四不視朔

或言月或言朔者朔舉始月舉終或言告或言視者謁上曰

告臨下曰視告於廟視於朝四不視朔是四月不朝也何不

曰不朝視朔重於視朝也公之不視朔奈何疾也或曰非疾

也託也不言猶朝於廟則朝廟亦廢矣。傳曰自是公無疾

不視朔也非也蘇氏轍曰五月書四不視朔則六月視朔矣

視朔之廢非始於此也

六月戊辰公子遂及齊侯盟于鄆丘

秋八月辛未夫人姜氏薨

毀泉臺

毀者墮之盡傳曰泉臺即臺也築之非毀之非非祖之爲而

毀之是非祖矣喪不貳事貳事志哀也

楚人秦人巴人滅庸

不稱及莫適爲主也庸國也

冬十有一月宋人弑其君杵臼

弑者或稱人或稱國或稱名何也傳信稱名疑者稱人畧者

稱國傳曰稱人者君無道非也君卽無道弑者亦賊也又曰

賤者稱人非也若賤者稱人是釋賊不討也以理揆之弑君之賊雖賤亦宜書名不得以微者之名不登春秋例之也獨陰賊而無主名者乃宜稱盜耳杵臼何以弑傳曰帥甸攻而殺之則未知誰弑君者也。方氏苞以稱人為微者稱國為懸獄亦非也稱國稱人皆懸獄。稱人者三朱杵臼齊商人莒密州稱國者四莒庶其晉州蒲吳僚 薛比

十有七年春晉人衛人陳人鄭人伐宋

傳曰討弑君猶立文公而還卿不書失其所也非也即失所者人之何為外卿大夫恒稱人非貶也

夏四月癸亥葬我小君聲姜

齊侯伐我西鄙

六月癸未公及齊侯盟于穀

諸侯會于扈

傳曰平宋也左氏以二扈皆晉侯親之方氏苞以二役實趙盾主之皆非也

秋公至自穀

冬公子遂如齊

十有八年春王二月丁丑公薨于臺下

秦伯罃卒

夏五月莒人弑其君商人

商人弑君者也齊人弑弑君者也何為不以國討之辭書非

國討也以為賊也則不當君之以為君也而弑之是弑君而已矣故不從州吁無知之例。傳稱邴歆閻職經不書名疑

傳所云者未必實

六月癸酉葬我君文公

秋公子遂叔孫得臣如齊

書使不書介常也此何以書卿介卿也其卿介卿奈何遂欲弑君結外援挾國卿同往得臣爲與乎弑者也

冬十月子卒

方氏苞曰子卒而不地葬而不書故也子般之卒日黨氏微之也子野之卒日季氏告之也子赤之卒不日蓋事在宮闈不可得而考矣。又曰傳載叔彭生之死而不見於經孔子削之也非也彭生不卒安知非史闕之抑或畏仲遂而不敢書也此不得謂孔子削之若謂發後人之疑則纂弑之迹書法顯然亦不待削彭生之卒而見也卒又法不當削夫人姜氏歸于齊

歸者大歸也夫人子赤之母子卒夫人歸纂弑之迹顯然矣季孫行父如齊

致夫人也前乎子卒則如齊後乎子卒則如齊是齊與聞乎故也成乎弑逆之謀者遂得臣行父

莒弑其君庶其

弑君或稱人或稱國文有詳畧皆疑獄而未有所歸也。傳曰僕因國人以弑紀公舊說以已古通用明非莒僕弑君也若莒僕實弑則當自立何爲以寶玉奔魯乎非僕弑君故經不書名

春秋說畧卷六

春秋說略卷七

棲霞郝懿行學

海陽趙銘彝校刊

宣公

元年春王正月公即位

桓即位忍也宣即位忍也皆與聞乎故也

公子遂如齊逆女

為桓逆者翬也為宣逆者遂也皆賊也公以喪昏者急自結於齊

三月遂以夫人婦姜至自齊

遂不稱公子蒙前文也姜不氏者畧辭也此未有言納幣者一禮不備貞女不行公以喪娶夫人行非貞也或曰不稱氏貶也非也夫人一國之母非臣子所當貶也稱婦者有姑辭

也出姜出無姑矣敬嬴者妾姑也成乎宣公之篡者仲遂敬
嬴○杜預以不書氏爲闕文非也

夏季孫行父如齊

晉放其大夫胥甲父于衛

放者棄而置也放或稱國或稱人何也放與殺同例○或曰

稱國以放者放有罪稱人以放者放無罪非也稱人以放見哀三年

公會齊侯于平州

公子遂如齊

六月齊人取濟西田

濟西田取諸曹者也齊何爲取諸魯賂故也何爲賂會平州

之賂也何爲會平州定公位也此魯田何爲不言我互見也

據十○桓之立也許田假於鄭宣之立也濟西取於齊皆賂

也胡氏例以會者外爲志此宜稱及而曰會誅齊以孤賊黨也非也

秋邾子來朝

楚子鄭人侵陳遂侵宋

晉趙盾帥師救陳

楚侵陳宋圖霸也晉救陳急陳也不救宋蓋宋未病也或曰

宋有罪不與救也或曰闕文也皆非也救則書不救則不書

宋公陳侯衛侯曹伯會晉師于棐林伐鄭

晉趙盾既救陳移師於棐林四國往而會之也何以不言會

趙盾大夫與師敵各隨其事以著稱此爲兵會非好會故稱

師胡氏主公羊謂君不會大夫非也

冬晉趙穿帥師侵崇

晉人宋人伐鄭

傳曰伐崇爲秦也伐鄭爲宋也俄而鄭敗宋秦伐晉

二年春王二月壬子宋華元帥師及鄭公子歸生帥師戰于大棘宋師敗績獲宋華元

皆言帥師將尊師衆也言敗復言獲大夫與師敵也

秦師伐晉

夏晉人宋人衛人陳人侵鄭

秋九月乙丑晉趙盾弑其君夷皋

經曰盾弑傳曰穿弑入穿所以出盾也謬也傳所以出盾者爲盾賢也賢也而弑君則所謂賢者乃所以釣世之名而蓋其彌天之罪傳者爲所欺而曲庇之耳果若不討賊者經當書趙盾使穿弑其君夷皋或云盾既外出變由內作亦猶漢

許后之弑霍光不知懿行謂卽如此霍光不討妻顯光不爲無罪雖復入穿終不能出盾。趙盾許止諸獄如傳所載顯悖於經當如歐陽子信經不信傳

冬十月乙亥天王崩

三年春王正月郊牛之口傷改卜牛牛死乃不郊猶三望

口傷自傷也或言卜郊或言卜牛何也卜郊者兼卜牲日卜牛者專卜牲也牛死乃不郊爲牲廢郊也卜郊不從乃不郊爲牲日皆不吉廢郊也牛傷牛死何以書爲災也卜郊不從何以書爲譴也災於物譴於天以爲上帝弗歆也禮爲天王服斬衰王崩猶未葬遽僭越紼滋益罪也

葬匡王

楚子伐陸渾之戎

戎在伊洛近王都楚子伐之無君甚矣傳曰蓋問周鼎焉

夏楚人侵鄭

秋赤狄侵齊

宋師圍曹

冬十月丙戌鄭伯蘭卒

葬鄭穆公

葬不月闕文也

四年春王正月公及齊侯平莒及邾莒人不肯公伐莒取向

莒邾有怨平之義也挾齊侯而強之平非義也莒人不肯義

不肯也平而伐之不義甚矣傳曰其言不肯何辭取向也

秦伯稻卒

夏六月乙酉鄭公子歸生弑其君夷

據傳子公實弑加之歸生者與聞乎故也非也與聞者信有
罪釋首賊而坐與聞之人然則春秋成而亂臣賊子免矣。
傳曰鄭人討幽公之亂斲子家之棺逐其族其為歸生弑可
知

赤狄侵齊

秋公如齊公至自齊

冬楚子伐鄭

五年春公如齊

夏公至自齊

秋九月齊高固來逆叔姬

公穀經作子叔姬

傳曰公如齊高固使齊侯止公請叔姬書曰來逆公自主也
厭尊毀列辱己甚矣。公穀經竝為子叔姬此下經亦為子

叔姬而此經無子字蓋闕文宜從公穀

叔孫得臣卒

冬齊高固及子叔姬來

高固來反馬也子叔姬來歸寧也反馬不躬至歸寧無竝行古者自天子以至大夫皆有留車反馬之道反馬之節以三月

楚人伐鄭

六年春晉趙盾衛孫免侵陳

夏四月

秋八月螽

螽何爲或繫月或繫時繫時者久也繫月者未久也雖未久書也

冬十月

七年春衛侯使孫良夫來盟

夏公會齊侯伐萊

秋公至自伐萊

大旱

冬公會晉侯宋公衛侯鄭伯曹伯于黑壤

良夫來盟衛欲爲晉致魯也會于黑壤始從晉也傳曰公不與盟諱之非也經惟書會耳實未嘗盟也若實盟言會何以取信乎

八年春公至自會

夏六月公子遂如齊至黃乃復壬午齊師入魯

復者事未畢何以復有疾也何不言有疾君命不爲疾止也

死以尸將事可以言其死也辛巳有事于大廟仲遂卒于垂壬午猶繹萬入去籥

有事者時祫也以于大廟知之遂不稱公子蒙前文也其稱

仲著貴寵也繹者賓尸也猶者可以已也萬者舞也以無聲

入籥者管也以有聲去檀弓曰非禮也卿卒不繹。公羊以

萬為千舞籥為籥舞非也毛氏詩傳以千羽為萬舞是萬兼

二舞

戊子夫人嬴氏薨

晉師白狄伐秦

或稱赤或稱白何也別也殺之役姜戎稱及此不稱及蓋白狄為主抑或莫適為主也

楚人滅舒蓼

秋七月甲子日有食之既

冬十月己丑葬我小君敬嬴雨不克葬庚寅日中而克葬

己丑葬日也庚寅非葬日也葬既有日不為雨止禮也雨不

克葬權也葬以平旦虞以日中禮也日中而葬慢也。馮氏

荆南曰書日中而克葬譏亟也若葬無譏則書庚寅而克葬

可也蓋葬必以朝既以雨止而至庚寅何不可更易一夕之

期而必以日中亟葬哉

城平陽

楚師伐陳

九年春王正月公如齊公至自齊

夏仲孫蔑如京師

齊侯伐萊

春秋左傳卷之七
秋取根牟

根牟東夷邑也國曰滅邑曰取不書將帥微者也

八月滕子卒

九月晉侯宋公衛侯鄭伯曹伯會于扈晉荀林父帥師伐陳辛酉晉侯黑臀卒于扈

傳曰會于扈討不睦也扈晉地也凡外諸侯卒於師曰師於會曰會在其國都不地於封內則地不葬者魯不會

冬十月癸酉衛侯鄭卒

宋人圍滕

楚子伐鄭晉卻缺帥師救鄭

陳殺其大夫洩冶

殺諫臣也殺諫臣未或不亡也傳曰靈公淫洩冶諫公孫寧

儀行父請殺之公弗禁

十年春公如齊公至自齊

齊人歸我濟西田

取矣何為歸以魯服故也取不言我歸言我互見也。馮氏荆南曰歸田獨此書我者濟西之田齊與諸侯皆有之而所歸獨我故封也若鄆謹闡則魯邑也龜陰之田獨魯有也而書我則贅矣

夏四月丙辰日有食之

己巳齊侯元卒

齊崔氏出奔衛

崔氏者何不知也或曰杼也或曰非杼也不名何也傳曰氏者舉族而出之之辭也。豐氏曰是崔天也氏天篆文相近

而譌恐非

公如齊

五月公至自齊

癸巳陳夏徵舒弑其君平國

六月宋師伐滕

去年圍滕既因其喪今又伐滕暴亦甚矣傳曰滕恃晉而不事宋

公孫歸父如齊葬齊惠公

晉人宋人衛人曹人伐鄭

秋天王使王季子來聘

傳曰王季子者王之母弟也其來聘也以報蔑也周聘魯止此。方氏苞曰書王季子未有職司也或曰時王之子猶時

君之女稱子以別也竝通

公孫歸父帥師伐邾取繹

大水

季孫行父如齊

冬公孫歸父如齊

齊侯使國佐來聘

傳曰行父如齊初聘也歸父如齊伐邾故也國佐來聘報聘也君未踰年不舉爵未即位不遣使此書齊侯使何也三月而葬太不懷也來聘稱使即吉速也君子以齊頃為無哀矣

饑

穀不成曰饑或言饑或言大饑何也大甚也饑未甚也雖未

甚書也

春秋饑二
大饑一

楚子伐鄭

楚五伐鄭暴也稱子稱人義非裏貶親將與不親將爾胡氏說並非

十有一年春王正月

夏楚子陳侯鄭伯盟于辰陵

楚莊始主諸侯盟也胡氏謂因其能謀陳而進之陳氏汪氏謂子楚以霸皆非也方氏苞曰傳稱侵鄭及櫟未嘗一語及陳事蓋因鄭服并徵會於陳而爲此盟本無討賊之心可知矣

公孫歸父會齊人伐莒

秋晉侯會狄于欒函

冬十月楚人殺陳夏徵舒丁亥楚子入陳納公孫寧儀行父子

陳

此一事耳楚或稱人或稱子何也屬辭之體也若書楚子殺之則不辭猶之執大夫皆稱人以執之無曰其君者也或曰稱人以殺討賊辭也非也討賊者不繫於稱人不稱人也楚亦非真能討賊者也宋人執鄭祭仲非討賊辭也楚人執陳行人干徵師殺之亦非討賊辭也入者不有其地公孫寧儀行父者陷君於惡者也又納之杜氏預曰二子功足補過善楚復之謬也○李氏紱曰造其國都曰入株林野郢去國都甚遠徵舒弑君豈敢復入國都楚子蓋就其私邑執而殺之然後入陳耳經書丁亥在殺徵舒之後正明殺而後入傳謂入而後殺誤矣○懿行按以經文推之蓋楚先遣大夫殺徵舒於私邑然後楚子親入其國都故殺徵舒稱楚人入陳稱

楚子亦猶上書齊人伐山戎下書齊侯來獻戎捷

十有二年春葬陳靈公

靈公弒三年矣始葬者漫也抑或徵舒亂國不得葬也傳曰賊不討不書葬然則賊不討而葬者多矣周桓王七年乃葬豈亦討賊而葬也

楚子圍鄭

夏六月乙卯晉荀林父帥師及楚子戰于邲晉師敗績

林父臣也楚子君也何為以臣及乎君春秋之法尊內而抑外先林父者內晉也後楚子者外楚也昔者齊衞王命伐衛春秋以衛及齊豈亦內衛外齊乎彼蓋屬辭之體也先書齊伐見主兵在齊後書衛及明主戰在衛傳者緣此謂凡戰言及皆為主乎是戰非也艾陵之役吳主戰也而以齊國書及

之則以內及外也明矣林父何為戰邲救鄭也不言救不及也偏師輕戰失律勦民自是楚莊橫日以兵力劫諸侯

秋七月

冬十有二月戊寅楚子滅蕭

經言滅傳言潰非實也楚既滅之厥後辰佗疆地入蕭以叛豈楚滅之不能有其地猶屬於宋與

晉人宋人衛人曹人同盟于清丘

四國稱人皆大夫也其曰同盟志同欲也盟之言曰恤病討貳陳貳於楚宋伐之衛救之非討貳也楚伐宋晉不救非恤病也清丘之盟未寒也

宋師伐陳衛人救陳

十有三年春齊師伐莒

夏楚子伐宋

秋螽

冬晉殺其大夫先穀

穀違命而敗邲雖信有罪矣晉釋將而誅佐又加以召狄之罪盡滅其族甚矣

十有四年春衛殺其大夫孔達

夏五月壬申曹伯壽卒

晉侯伐鄭

秋九月楚子圍宋

晉伐鄭邲故也楚圍宋陳故也皆稱爵君將也胡氏釋鄭罪晉釋楚罪宋頗矣

葬曹文公

冬公孫歸父會齊侯于穀

十有五年春公孫歸父會楚子于宋

夏五月宋人及楚人平

書宋及楚以內及外也上書公孫歸父會楚子于宋下書宋人及楚人平蓋魯實平之也內及齊平及鄭平皆不書人此書人何也屬辭之體也平者繫一國之事曰君大夫則嫌於一人之私內既不曰君大夫而外書齊人鄭人則贅矣若外及內平則無問其君大夫一皆稱人於義無嫌鄭人來渝平是也此宋人及楚人平則未知其君之意與或大夫之意與傳曰稱人貶也平者在下非也鄭人來渝平何不亦云平在下貶也○方氏苞曰使欲見平者在下則如袁婁書宋華元及楚子反盟不更切著乎

六月癸卯晉師滅赤狄潞氏以潞子嬰兒歸

潞氏國子爵赤狄別種嬰兒其名也

秦人伐晉

王札子殺召伯毛伯

王札子疑當為王子札也文誤倒耳傳曰王孫蘇與召毛爭政使札殺之臣不忌君無政刑也傳曰兩下相殺不志乎春秋非也大夫無專殺君殺大夫猶書之大夫殺大夫反不書乎凡兩下相殺稱名別於君殺也

秋螽

仲孫蔑會齊高固于無婁

初稅畝

初者始也稅者取民也畝者田畝也周制九夫為井井九百

畝分之九夫夫百畝徹取十畝以為賦而不收餘畝之稅故曰徹田為糧又曰歲取十千古者藉而不稅稅畝非古也既收十畝之入復履餘畝稅其十一是十取二也其後哀公謂有若曰二吾猶不足如之何徹也自是用田賦○孟子言井中為公田八家私百畝乃殷人助法非周之徹也徹無公私田

冬螽生

螽者螽子也何以書洊災也螽何以言生螽何以不言生螽飛蔽天不知所自來故不曰生螽見其生而知之故曰生螽生還為螽劉歆以螽為蚘蚘子非也螽即蝮蠅說者謂不因牝牡腹中陶冶而生故名

饑

螽者一時災饑者一歲災

十有六年春王正月晉人滅赤狄甲氏及畱吁

甲氏畱吁赤狄別種言及者別二族既滅潞氏又并盡其餘黨

夏成周宣榭火

成周洛陽王之下都宣榭蓋宣王講武屋也凡有廂有室曰廂無廂有室曰寢無廂無室曰榭或曰宣榭者樂器存或曰宣王廟皆非也廟不得謂榭榭不得藏樂火者人火之何以書存古也○經無書火者獨此有之公穀二經亦竝為災字疑此經本亦為災偶脫其上為火耳

秋邾伯姬來歸

來歸大歸也歸邾何以不書常也來歸何以書變也常事得禮不書變事雖得禮必書邾伯姬何以不卒既出不卒杞叔

姬何以卒為逆喪卒也

成八年九年

冬大有年

大者非常辭有者非常有大有年大熟也

十有七年春王正月庚子許男錫我卒

丁未蔡侯申卒

夏葬許昭公葬蔡文公

六月癸卯日有食之

己未公會晉侯衛侯曹伯邾子同盟于斷道

同盟者同欲也或曰同外楚或曰同謀齊或曰本為外楚徵

會齊侯不至故復謀齊

秋公至自會

冬十有一月壬午公弟叔肸卒

叔氏胙名也或稱公子或稱公弟何也主先君言曰公子主時君言曰公弟凡內稱公子皆卿也卿卒禮也此未仕何以卒傳曰賢也何以賢通恩也宣弒立胙非之欲去則不可仕則不義與之財不受織履而食終其身○或曰稱叔者譏世卿非也季友仲遂叔胙稱氏者皆以公爲之變而加禮故特著之方氏說是

十有八年春晉侯衛世子臧伐齊

公伐杞

夏四月

秋七月邾人戕郕子于郕

戕者殘殺之於國都者掩其不備郕子不名史失之

甲戌楚子旅卒

楚不卒此何以卒告則卒弔則卒楚莊彊會盟征伐交乎諸侯於是始卒之何以不葬避其號也何以稱子從其爵也

公孫歸父如晉

冬十月壬戌公薨于路寢

歸父還自晉至笙遂奔齊

還者事已畢笙魯地未及國也何以奔蓋逐也禮君薨聘使執圭復命於殯歸父家遣墀帷哭踊介復命走之齊然則誰逐之傳曰季孫行父言於朝而逐之捐君殯奔父使於臣爲死君於子爲死父

春秋說畧卷七

字通成方十里甸旁加一里也周制甸賦所出丘得十八人不及一甲今令六田二十五人則一甸所賦計百人矣故曰益兵○公穀以甲爲鎧非也杜氏預謂使丘出甸賦加三倍亦無是理獨胡氏得之

夏臧孫許及晉侯盟于赤棘

秋王師敗績于茅戎

王師者非王將也茅戎者戎屬也王者無敵王師何以敗自敗也不言戰省文也傳曰劉康公徼戎伐之叔服諫不聽敗

焉

冬十月

二年春齊侯伐我北鄙

夏四月丙戌衛孫良夫帥師及齊師戰于新築衛師敗績

以衛及齊者齊稱師非卿將也故後衛

六月癸酉季孫行父臧孫許叔孫僑如公孫嬰齊帥師會晉卻克衛孫良夫曹公子首及齊侯戰于鞏齊師敗績

凡戰書將不書佐此其書之何四卿竝將也四卿將者三軍也臧孫許逆晉師遂導之故與乎帥師耳四國戰鞏或曰爲婦人一笑也或曰齊卽楚故也袁婁盟而齊從晉者三十載○方氏苞曰春秋時軍帥正佐皆卿許行父之佐也嬰齊僑如之佐也蓋是時魯止二軍故其後三軍稱作

秋七月齊侯使國佐如師己酉及國佐盟于袁婁

屈完曰來盟此其曰如師何來盟者請盟也如師者非請盟也師在鞏矣盟則何爲於袁婁盟於召陵退盟也盟於袁婁進盟也退者以禮進者以力傳曰齊侯使國佐如師晉人不

肯佐怒而歸將復戰晉睨魯衛使請乃相與追焉而盟之乎
袁婁

八月壬午宋公鮑卒

庚寅衛侯速卒

取汶陽田

晉使齊還魯取者不以好得也介人威力而居有之汶陽田者魯故田也何以不曰齊人歸自外曰歸自內曰取

冬楚師鄭師侵衛

十有一月公會楚公子嬰齊于蜀

楚未有稱公子者自嬰齊始傳曰嬰齊爲陽橋之役以救齊侵衛遂侵魯師於蜀不書者蓋兵未加魯公懼而往會之也不沒公則知凡會盟不曰公者非公也

丙申公及楚人秦人宋人陳人衛人鄭人齊人曹人邾人薛人鄆人盟于蜀

會則曰公子嬰齊盟則曰楚人前曰後凡也諸國稱人皆大夫也其先楚主盟也○卿大夫稱人恒辭耳傳曰卿不書賈盟也非也

三年春王正月公會晉侯宋公衛侯曹伯伐鄭

傳曰討邲之役也宋衛未葬皆以爵舉非禮可知

辛亥葬衛穆公

二月公至自伐鄭

甲子新宮災三日哭

新宮者宣宮也何以不稱宣宮主未入也主未入何以不稱僖宮主已遷也僖公主已遷因舊宮而新焉新主猶未入於

春秋傳略 卷八
是災三日哭禮也。○宣公薨二十八日矣，主猶未入宮，緩也。傳曰：壞廟之道，易檐可也，改塗可也。此時新舊之主皆不在，故曰新宮。然是先人棲神之處，災而哭焉，固其宜也。三傳皆以爲禮。胡氏據劉絢謂宮成，主未入，不當哭。非也。李氏光地謂新主未入，舊主在焉，亦恐非檀弓記曰有焚其先人之室，則三日哭，明不必主在始當哭也。○記又曰：新宮火，亦三日哭。是此經災當爲火，如成周宣榭火之例。

乙亥葬宋文公

夏公如晉

鄭公子去疾帥師伐許

公至自晉

秋叔孫僑如帥師圍棘

傳曰：取汶陽田，棘不服，故圍之。凡內獨圍者皆叛邑。

大雩

晉卻克衛孫良夫伐廡咎如

廡咎如赤狄別種

冬十有一月，晉侯使荀庚來聘，衛侯使孫良夫來聘。丙午及荀庚盟。丁未及孫良夫盟。

言來聘不言來盟，非前定也。言及不目其人，義繫於盟，不繫於人，故不目也。鄭伯使其弟語來盟，不言何人與盟也。公子友如齊，涖盟亦不言何人與盟也。傳曰：不言及者，以國與之，不言其人，亦以國與之。○胡氏據劉敞謂庚良夫不繫國者，惡其遂事非也。來聘已繫國矣。

鄭伐許

鄭無人畧辭也。○胡氏以去人為貶非也。是年去疾伐許，明年鄭伯伐許，皆無貶，何以獨於此焉？貶杜氏預謂告辭畧亦非也。鄭人來告，亦必不自曰鄭人也。方氏苞謂赴告不及傳聞畧亦非也。列國侵伐多矣，苟無赴告，何得以傳聞書也。

四年春宋公使華元來聘

三月壬申鄭伯堅卒

案玉篇云：成公四年鄭伯緹卒。緹，古干切。是堅。古本作緹也。

公羊釋文云：堅本或作取，疏云左氏作堅。字穀。梁作賢，字今定本亦作堅字。

杞伯來朝

夏四月甲寅臧孫許卒

公如晉

葬鄭襄公

秋公至自晉

冬城鄆

鄭伯伐許

鄭舉爵者喪未踰年，即吉從戎。其父伐人喪其子，以喪伐人。

二年冬楚鄭侵衛，是伐喪也。

五年春王正月杞叔姬來歸

仲孫蔑如宋

夏叔孫僑如會晉荀首于穀

梁山崩

梁山晉望也。不繫國者，名山大澤，不以封。又地道廣遠，變異之應，非一國獨當。故地震山崩，不繫國。

秋大水

冬十有一月己酉天王崩

十有二月己丑公會晉侯齊侯宋公衛侯鄭伯曹伯邾子杞伯同盟于蟲牢

傳曰鄭服也鄭與許訟而不勝背楚卽晉故爲是盟胡氏曰天王崩會盟不廢見其皆不臣

六年春王正月公至自會

二月辛巳立武宮

立者不宜立也武宮者武公之宮武公者去公十一世廟毀久矣又立之○杜氏預誤以武宮爲武軍謂季文子以鞏之戰立非也

取鄭

鄭微國也或曰邾邑非也取邑無不繫國者○方氏苞曰取者取爲附庸也謂內滅書取非也徐人取舒外亦書取滅項內亦書滅以此知滅與取異道也

衛孫良夫帥師侵宋

夏六月邾子來朝

公孫嬰齊如晉

壬申鄭伯費卒

秋仲孫蔑叔孫僑如帥師侵宋

傳曰晉命也宋旣同蟲牢之盟諸侯謀復會宋以內難辭焉晉於是命魯衛侵之○胡氏謂伐也貶而書侵寧有是理

楚公子嬰齊帥師伐鄭

冬季孫行父如晉

春秋公傳卷八
晉欒書帥師救鄭

七年春王正月鼯鼠食郊牛角改卜牛鼯鼠又食其角乃免牛

鼯鼠微鼠也牛角如繭栗日展焉見其傷改卜牛又食之游

災也傳曰備災不至非也鼯微矣其為害無可備按黃氏震

口鼠也噬人畜不知痛

吳伐郟

夏五月曹伯來朝

不郊猶三望

免牛即不郊矣再言之者免牛在春不郊在夏既不同時須

備言之○胡氏据朱長文以為三望僭天子禮然與僖三十

一年傳不合蓋失檢也

秋楚公子嬰齊帥師伐鄭公會晉侯齊侯宋公衛侯曹伯莒子

邾子杞伯救鄭八月戊辰同盟于馬陵

同盟同病楚也傳曰尋蟲牢之盟且莒服故也晉自靈公數

以大夫主會盟遂失諸侯楚主夏盟近二十年至是景公屢

出會盟而諸侯復集

公至自會

吳入州來

州來微國楚所與入之將以撓楚也春伐郟秋入州來吳始

疆也傳曰晉人巫臣為之也吳以國舉與荆同

冬大雩

衛孫林父出奔晉

八年春晉侯使韓穿來言汶陽之田歸之于齊

戰鞏之後齊服事晉故晉復來言歸其所取汶陽田者魯故

田也歸者取取者歸晉無信齊無義魯無權以是為市而已
晉欒書帥師侵蔡

公孫嬰齊如莒

宋公使華元來聘

夏宋公使公孫壽來納幣

納幣常事何以書傳曰錄伯姬也或曰卿納幣非禮也或曰
禮也

晉殺其大夫趙同趙括

秋七月天子使召伯來賜公命

天子天王通稱爾賜與錫同義爾或皆因近似而誤

冬十月癸卯杞叔姬卒

晉侯使士燮來聘叔孫僑如會晉士燮齊人邾人伐郟

衛人來媵

媵淺事耳何以書傳曰錄伯姬又曰三國來媵非禮也古者

諸侯三歸二國往媵以姪娣從凡九女唯王后三國媵則十

二女。傳曰諸侯嫁女同姓媵異姓否非也若媵必同姓經

唯書齊人來媵足矣不必復書衛晉也媵必異姓者以一姓

之女不皆宜子故也論語云管氏有三歸包氏咸曰三歸娶

三姓女婦人謂嫁曰歸

九年春王正月杞伯來逆叔姬之喪以歸

杞伯來自來也叔姬出未反沒而親逆其喪非禮也或曰叔

姬無罪也非也杞辱國耳果若叔姬無罪被出魯人寧受而

甘心乎書曰以歸成之為婦也汪氏克寬曰夫在而逆喪歸

葬則自應祔廟與宋襄公母異矣

公會晉侯齊侯宋公衛侯鄭伯曹伯莒子杞伯同盟于蒲
傳曰爲歸汶陽之田故諸侯貳晉人懼爲是會

公至自會

二月伯姬歸于宋

逆者非卿故不書

夏季孫行父如宋致女

致猶至也女嫁三月而廟見稱婦隨加聘問以安之謂之致
女常事耳何以書傳曰錄伯姬也或曰卿致女非禮也或曰
禮也

晉人來媵

伯姬歸宋復來媵者凡媵必送至嫁女之國隨嫡而行
秋七月丙子齊侯無野卒

晉人執鄭伯晉欒書帥師伐鄭

因朝而執也傳曰鄭伯如晉晉人討其貳執之銅鞮而伐之
冬十有一月葬齊頃公

楚公子嬰齊帥師伐莒庚申莒潰楚人入鄆

伐莒稱嬰齊入鄆稱楚人者前日後凡也方氏苞謂嬰齊在
莒而以偏師入鄆故書楚人恐非伐莒入鄆兩事也故再舉
楚人人卽嬰齊也猶之會蜀稱嬰齊盟蜀稱楚人原止一人
秦人白狄伐晉

鄭人圍許

傳曰示晉不急君也

城中城

中城者或曰東海邑或曰魯內城楚潰莒入鄆迫近魯故

以備不虞又得時此不爲譏杜氏預曰此閏月城在十二月後也○傳曰非外民胡氏曰譏警守之微皆非也

十年春衛侯之弟黑背帥師侵鄭

傳曰晉命也方氏苞曰其稱弟未有職司而任國之大事也夏四月五卜郊不從乃不郊

夏四月不時也四卜非也況五卜乎傳曰不免牲故言乃不郊非也卜者卜日與牲不從者二事皆不吉也不郊之故乃兼包牲日故須言不郊以見之非止爲不免牲一事也然則饑鼠食郊牛角旣言免牛又言不郊者間有異事也彼不郊但爲牲災非日不吉故特言卜牛而已

五月公會晉侯齊侯宋公衛侯曹伯伐鄭

晉侯者獯也傳曰獯有疾立太子州蒲爲君非也州蒲生代

父獯生立子大惡也春秋何故成之○此與邾太子朱儒事皆傳誣經者也傳又曰鄭人改立君晉伐鄭而歸鄭伯若然經何不書也

齊人來媵

丙午晉侯獯卒

秋七月公如晉

傳曰晉人止公送葬蓋魯人辱之故不書葬非孔子削之也冬十月

十有一年春王三月公至自晉

晉侯使卻犢來聘己丑及卻犢盟

晉人止公凡九月懼公歸而貳也使卻犢隨加聘問犢因以便宜結盟稱及者與荀庚同

夏季孫行父如晉

秋叔孫僑如如齊

冬十月

十有二年春周公出奔晉

傳曰自周無出非也天王之出也鄭也周公之出也晉也凡王居內地則不言出臣自外奔亦不言出周公何以奔傳曰惡惠襄之偪且與伯與爭政也

夏公會晉侯衛侯于瑣澤

傳曰宋華元克合晉楚之成非也經無楚也又曰鄭伯如晉聽成會于瑣澤成故也非也經又無鄭也

秋晉人敗狄于交剛

冬十月

十有三年春晉侯使卻錡來乞師

言乞者重師也又明列國之體不相統壹非王命而徵師皆非禮故內外通曰乞

三月公如京師

朝也何以不言朝書如京師則朝不待言也踐土河陽言王所故須言朝京師不言王所故不言朝也雖朝而非特朝道過也或曰書如者不與朝也非也內書朝曰如公如齊如晉如楚皆朝也

夏五月公自京師遂會晉侯齊侯宋公衛侯鄭伯曹伯邾人滕人伐秦

書公自京師者著實也不書公自京師則無以見會諸侯於京師又無以見諸侯皆朝於京師也書遂會者亦著實也不

書遂會則疑朝王與會伐爲兩事也遂者繼事之辭此雖繼事實本事也

曹伯廬卒于師

案檀弓記曰諸侯伐秦曹桓公桓經卒於會諸侯請含使之襲此可見諸侯卒于師之禮

秋七月公至自伐秦

不以京師致者道過也

冬葬曹宣公

十有四年春王正月莒子朱卒

范氏甯曰徐邈云葬皆稱諡莒君無諡故終春秋不葬。懿行按傳稱渠丘公犁比公皆號也知無諡

夏衛孫林父自晉歸于衛

歸或言復或不言復文有詳畧耳或曰大夫無復道故復歸爲惡歸爲善非也復歸爲惡晉趙鞅叛也何以歸不言復方氏苞謂復歸爲難歸爲易亦非也復歸爲難衛元咺歸自晉無難矣何以言復宋華元亦歸自晉無以見爲不難也何以不言復

秋叔孫僑如如齊逆女

鄭公子喜帥師伐許

九月僑如以夫人婦姜氏至自齊

一事而再見者卒名之僑如不氏前已見也夫人稱婦有姑辭也穆姜存焉耳稱氏異於不稱氏者何詳畧辭耳趙氏匡謂書氏傳寫誤衍未必然也或曰無貶也非也夫人非臣子所當貶氏與不氏又非褒貶所在也

冬十月庚寅衛侯臧卒

十有五年春王二月葬衛定公

三月乙巳仲嬰齊卒

嬰齊者何不知也其稱仲蓋於歸父爲子行而襄仲之孫也孫以王父字爲氏也傳曰爲人後者爲之子仲嬰齊者後歸父也非也弟後兄是孫亦可父祖乎歸父家遣嬰齊蓋以庶孫後仲遂故世稱仲氏○方氏苞謂是時魯有二嬰齊皆公孫使其卒書公孫嬰齊則與十七年卒豨脹者無以知爲兩人故魯人以仲爲別而舊史因之非也卿卒皆書氏而嬰齊獨以與人同名變而書字則非義所安且魯人私立號名以相識別何足登於春秋乎若二嬰齊果皆公孫氏於其卒也

皆書公孫嬰齊亦何嫌爲非兩人而必瑣瑣然別之也

癸丑公會晉侯衛侯鄭伯曹伯宋世子成齊國佐邾人同盟于戚晉侯執曹伯歸于京師

盟于戚討曹也傳曰曹宣公卒負芻殺太子而自立三年矣稽討也又盟焉盟則不當討討則無與盟盟而執之非禮也歸于京師正也凡執諸侯或稱爵或稱人何也義繫於執不繫於稱爵稱人凡執稱人畧辭也以爲不必別也其或稱爵便文也以爲不得不別也晉侯入曹執曹伯則稱爵蒙上文也若入曹稱爵執稱人則疑親執者非晉侯也此同盟于戚執曹伯則稱爵亦蒙上文也若同盟稱爵執稱人則疑親執者非晉侯也二者皆辭有所窮也外此無稱爵者矣傳曰稱爵以執者霸討稱人以執者非霸討非也凡稱爵稱人非褒

貶所在春秋不以爵為褒人為貶。○既盟於戚然後執曹伯是盟而後執兩事也。故必再言晉侯會於孟執宋公是因會而執一事也。又在會諸侯同執之故不得再言楚子公至自會。

夏六月宋公固卒

楚子伐鄭

秋八月庚辰葬宋共公

宋華元出奔晉。宋華元自晉歸于宋。宋殺其大夫山。宋魚石出奔楚。

傳曰：華元相宋，蕩山弱公室，殺子肥。於是華元恥之，走之晉。山不氏從告辭也。魚石者，山族也。走之楚。傳曰：魚石止華元於河上，反而歸，非也。若華元實未至晉，經何得書自晉歸也。

○方氏苞曰：再書華元與良霄自許入鄭，異辭正為晉宋懸隔千里，奔晉歸宋非一時事，不得不再舉華元許鄭接壤。良霄方出，即入不得再舉良霄，皆因事屬辭以著其實也。○又甲曰：宣成而後外大夫無不氏者，而宋山獨不氏從告辭也。其國惡之，故告不以氏。謂春秋削之非也。弑君之賊無不氏而山以背族，削氏則其類頗矣。按後一條見方氏春秋通論

冬十有一月，叔孫僑如會晉士燮、齊高無咎、宋華元、衛孫林父、鄭公子鱒、邾人會吳于鍾離。

會又會者，兩會也。吳子彊，諸侯之大夫不敢致其來為會，以謀之於是乎相率以往。鍾離者，楚邑也。迫近吳，就而與之會。傳曰：殊會吳外之非也。即外吳者，何以不外楚。善木水水許遷于葉。善木水水

十有六年春王正月雨木冰

不雪而雨温也既雨而冰寒也上温而下寒雨著木成冰或

曰木稼或曰木介也。胡氏據何休云木少陽冰兵象冰脅

木大臣執兵之徵鑿矣

夏四月辛未滕子卒

鄭公子喜帥師侵宋

六月丙寅朔日有食之

晉侯使欒黶來乞師

甲午晦晉侯及楚子鄭伯戰于鄢陵楚子鄭師敗績

戰稱將敗稱師常也此何以書楚子凡君敗稱君師敗稱師

舉其甚者此敗者楚子耳矢集於其目然則泓之敗宋公傷

股何以稱師師敗甚也抑或楚子當為楚師文誤耳

楚殺其大夫公子側

秋公會晉侯齊侯衛侯宋華元邾人于沙隨不見公

既曰公會矣又曰不見公何也會者其志也不見者其事也

諸侯為期謀伐鄭公會焉而之乎沙隨晉侯信讒而嫌公不

見也傳曰鄢陵之戰魯後師期僑如訴公於晉侯。沙隨不

見公平丘不與盟直書無隱胡氏遂謂二役曲不在公故不

諱非也即曲在公亦不得諱也諱則沒其實矣

公至自會

公會尹子晉侯齊國佐邾人伐鄭

尹氏王卿士子爵未有以王臣會伐者於是始

曹伯歸自京師

執而歸者名此何以不名啖氏助曰諸侯失地反國則名曹

伯在京師而王不黜之是不失國故不名也
九月晉人執季孫行父舍之于莒丘

執未有言舍之于者此其言之何舍者釋也舍之于莒丘明乎未嘗執以歸耳或曰舍寘也

冬十月乙亥叔孫僑如出奔齊

十有二月乙丑季孫行父及晉卻犇盟于扈

公至自會

高氏閔曰內大夫執則致行父不致者公待行父偕歸舉公爲重也

乙酉刺公子偃

偃之罪未有聞焉爾傳曰穆姜私乎僑如欲去季孟公難之姜怒適偃來前指之曰汝不可者吾使是爲君而去之公疑

是言歸而刺之然則其與刺公子買異辭何也方氏苞曰戍衛不卒戍刺買之獄辭也故舊史據而書之若偃之刺其故不可言也刺之亦不能言其故也直書刺而已

十有七年春衛北宮括帥師侵鄭

夏公會尹子單子晉侯齊侯宋公衛侯曹伯邾人伐鄭

六月乙酉同盟于柯陵

不目諸侯尹單與盟也未有王臣與盟而稱同者於是始

秋公至自會

齊高無咎出奔莒

九月辛丑用郊

九月不時甚也用郊者不卜日不卜牲直郊而已。劉氏做以用爲用人以祭恐非也昭十年季平子始用人於亳社

晉侯使荀罃來乞師

冬公會單子晉侯宋公衛侯曹伯齊人邾人伐鄭

晉未能服鄭三假王命以臨之鄭人卒不服。方氏苞曰齊書人非卿也自成以後列國之卿會盟侵伐皆以名見其不名者非卿也懿行謂外卿大夫恒稱人或名或不名史有詳畧耳未必如方氏所說

十有一月公至自伐鄭

壬申公孫嬰齊卒于貍脰

從公伐鄭歸也道疾而卒蘇氏轍曰大夫卒不地其地在外也杜氏預曰十一月無壬申日誤也。案公穀傳竝以壬申爲十月十五日也以爲待公至然後卒大夫故十月之日書在十一月之下非也月日顛倒史無此例上書昭公孫于齊

下書叔孫婁卒非待公至然後卒大夫也

十有二月丁巳朔日有食之

邾子貜且卒

晉殺其大夫卻錡卻犇卻至

一朝而尸三卿傳曰胥童爲之也未幾亦誅死

楚人滅舒庸

十有八年春王正月晉殺其大夫胥童

庚申晉弑其君州蒲

傳曰欒書荀偃使程滑弑也何以不書凡傳所據者或傳聞異辭經既不書則未知傳之信否也春秋不以疑加人竹書紀年又云晉厲公卒復不言弑。孔疏引應劭云周穆王名滿晉厲公名滿是同名不諱今作蒲豈誤與

齊殺其大夫國佐

公如晉

夏楚子鄭伯伐宋宋魚石復入于彭城

入者逆辭也不言納者楚鄭自伐宋本不為納魚石石自乘

亂而入故不言納據公孫寧儀行父言納見宣十一年

公至自晉

晉侯使士匄來聘

秋杞伯來朝

八月邾子來朝

築鹿囿

囿者禽府也鹿者其名也築者為牆也虞民利非正罷民力不時其後昭築郎囿定築蛇淵囿

己丑公薨于路寢

冬楚人鄭人侵宋

晉侯使士魴來乞師

十有二月仲孫蔑會晉侯宋公衛侯邾子齊崔杼同盟于虛杙

傳曰謀救宋也

丁未葬我君成公

春秋說畧卷八

春秋說畧

卷八 成公



